



Regd.No.19134/88 <http://www.kbc.org.in> NAI/220/99
No-G-4/Regd.Magazine/KBCThuso/8888-81

KBC | THUSO

So483

Kum 56 Ihinna

Lhajing/August 2019



Dantheina

KHOHSAHDING
SEPTEMBER EVENTS

Shalom Theological Seminary - 11

Kanggui Christian College - 18

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



5 July, 2019 nikhon Lom Resource Centre mun ah Gambih le Houbung chomchom akon thingkeh phu na anakinei tai.



Jan nisim 30, 2019 nikhoa Tripura Dhalai mun a Kamalachhara Baptist Church a Mission lamkai ho Tour a agache nao.

CONTENTS

THUMAKAI HO

1. Damtheina Khohsah/ <i>Editorial</i>	2
2. Tahsa DAMTHEINA/ <i>Dr. Thangjamang Haokip MD</i>	4
3. CHRISTIAN INSUNG NOM / <i>Rev. Paojangam Haokip</i>	7
4. KIKHELNA/ <i>Pastor Khupjoyful Singson</i>	11
5. Mission Column	13
6. Men Column	17
7. Women Column	18
8. Youth Column	20
9. Literature Column	23
10. Reports	25
11. Condolance	31

EDITORIAL BOARD

<i>Chairman</i>	: <i>Rev. Tonglet Haokip, President KBC</i>
<i>Editor</i>	: <i>Dr. M. Thongkhosei Haokip, General Secretary</i>
<i>Joint Editor</i>	: <i>Rev. Henjalan Doungel</i>
<i>Contributing Editors</i>	: 1. <i>Rev. Letpu Kipgen</i> 2. <i>Rev. Onthang Haokip</i> 3. <i>Rev. Kaikhokam Chongloi</i> 4. <i>Pastor Paokhohao Haokip</i> 5. <i>Pastor Satminlen Khongsai</i>
<i>Cir. Manager</i>	: <i>Ms. Lhingjanem Haokip</i>
<i>Design & Layout</i>	: <i>Hemkholen Haokip</i>

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 8131803543 Contact thei.
Circulation to kisai lam Mobile No. 9862633173 bol ding.

Editorial...**Damtheina Khohsah****Editorial****Thumakai:**

Amasatah in muntina um Kuki Christian chate jouse ahideh a KBC member ho jouse chungá i Pakaiyu Jesu Christa minin salaam kahinpe cheh uve. Tulha thupi chu "Damtheina Khohsah" ahi toh kilhonin, hiche thudol ah chomcha ana kihoulim u hite.

Thulaigil

Damlou kijenna in mun (Hospital) khat a akholgil hon akhol nauva, asunga damlou 100 lah a mihem 70 vel hi atahsa a damlou sanga lungthim damlou ahiuve ati. Hichehi adih a ahile, mihem te damlouna hi atamjo lunggel a kon ahi tina ahi.

Mihem khat chu akipa jing theiya ahile atahsa jong adam theyin, amavang alungthima kipana anei lou tenga ahile damtheina toh kikangse thima ahitai. Damtheina dingin lunggel pha apoimo e. Sapten 'Be positive'ahilou le 'have a positive mindset' atiu khun thil igel hou aphajo lampang a gel ding ti ahi. Atahbah chun, ahungsoh loulai thil igel laiya

ilung lal masat leh akijou/lohing beh seh poi akitie. Jo le jolou thuchom hitaleh, kajo ding ahi tia gela tonga chun atamjo alolhingun, jou jong ajou (victory) jiuve.

Lhagao lam thudola, sappaova 'Çount your blessings' atia eipauva 'Naphat theina aban-chan simin' ti la khu hitobang positive lam-dolla hinkho man ding in adoiyin ahileh, Bible a abung achang kitoh chat aum lou vangin, Rom 8:28 na a, "Ahin Pathen ngailuho chengse, Ama lunggot lam doltah a kikouho ding vang chun, ijakaiya aphantna dingu atongkhom e ti chu iheuve" ati hi toh akijui lheh in, phatah a sangho dinga ipi soh jong le athohje aheth a damna hinkho amanding ahi.

Hichan ihin seinauva kona kicheh tah a hung kilang thei chu ahile, damtheina tah um/nei na dingah, mikhat chun Pathen to akicham masat a, hichea kona ahinkhoa thil ipi hung lhung jong le Pathen phatsah ahi tia kigel lhahna anei theiya, achesa phat a kish gunkei louva lhinglal le bol khel akisahna hoa jong ama le ama akingaidam theiteng le damtheinan ajui ding ahi.

Thuchaina

Tahsa, lhagao, chuleh lungthim a idamthei teng leiset a hihen lhagao lam hijong leh khantouna hung um tan tin, Pathen lungdeihoh toh muolso in hung um tante. Damthei nading khohsahna dingin Bible sim, taona man chule lunggel pha le adih gel uhite. Lunglut tah a sim jouse chungu Pathen vangpeh chang taken.

Tahsa DAMTHEINA

Hepatitis (Thin Natna)



*Dr. Thangjamang Haokip MD
Dermatology, Leprosy and STD*

SERMON

Thin (Liver) anat teng leh hepatitis tin akihen ahi. Anatna hung kona dungjui in Hepatitis natna hi jat chom chom in akikhen in ahi. Gah hetthei ajeh hochu viral natpi jeh , lou neh akon , ju hadon jeh, ahilou leh amacham cham (auto immune) jeh akon hithei ahi. Alhangpi anatan hi, Mit eng (jaundice), Bu dulou, khosih(fever), tha moh cholchol(fatigue), lohso, oinat(pain abdomen), tahsa chung nat chet chut(malaise), thin pom tihohi ahi. Asot teng leh thin ahung tah(fibrosis) jin, oisunga twi ahung um jin chuleh kamsung ahilouleh pampot nalama thisan ahung long doh jin ahi. Hiche tengleh chronic hepatitis tin akihei. Chuleh hichiteng leh cancer jong hung kondoh thei ahi.

Viral natpi akon ahileh viral hepatitis tin akihei. Viral hepatitis hi tulai a akihaseipen natna khat ahi. Anatna pi hi tampi umjong leh akhohdehset chi (types) nga(5) aum in ahi. Hiche hochu A, B, C, D, E tin akihe in ahi. Ajeh

chu hicheng hohi hepatitis natna hungkon napen leh mihem dinga thi nathei pen ahi.

Anat dan

Hepatitis A hi alhangpi a chapangho anatnom uvin ahi.

Akilahmat dan chu, twi thenglou donna kon, neh thenglou akon, chuleh jun le aeh akon kilamathei ahi. Anat danhi lohso, thachol, chuleh Mit eng chuleh aekhho ti hohi ahi. Hepatitis A natna pi thana ding lou aum lou jeh in kiven hi pha pen ahi. Ahin aki-jenlou jongleh amachama dam thei ahi. Chuleh adammo saho avelin anungnat jitapoi. Akivending dan chu: junleh aeh thathang louding, neh leh chah sin (cover) tup jing ding, chuleh anneh kon leh khut kisop thengsel ding ahi. Ahilouleh vaccine jong kikapthei ahi.

Hepatitis B hi chapang chuleh alenho jong nathei ahi. Akilahmat dan chu, thisan thenglou kikhai akon, anatna nei ho mansa syringe manjeh akon, tattoo kibol, toothbrush akon, numei pasal kitimat akon chuleh chapang hon anu akonna kilatheih ahi. Hetding khat chu hiche natna hi twi, chibai bol, chuleh neh leh don akon akilathei poi. Atamjo hi anatna sohdoth jipon chuleh lha khat/ni sung in amachamin adam jitai. Anatna ahung sodoh a hetttheija ahung um jitengleh ana sotji tai, hichitengleh chronic hepatitis B tin akihei. Asot tengleh thin(Liver) cancer hung kondoh thei ahi. Chuleh hiche natna kiven nading a vaccine kibol ding ahi. Vaccine thumvel pehding ahi. Ahitheih channa ahung pien-pien ah pehding ahi.

Hepatitis C jong hi B banga thisan chuleh syringe kimankop akon kilatheih ahi. Anatna kilah atamjo tichu jalah a 50- 80 per cent tobang natna akipoh den jiuvin ahi. Akivenna ding vaccine aumpon, chuleh asotna ahileh thin cancer ahung umdoh thei in ahi. Anatdan jong hi hepatitis B tobang ahi. Tulai a hepatitis C jenna a kiha manpen lou ho chu sofosbuvir, simprevir, ribavirin chuleh peglyated interferon hohi ahi. Nehtho thei louthah khat Gilead science Inc's company in tulai tah hin ahin semdoh in, ahin eiho gam India a aumhieh lai e.

Hepatitis D hi Hepatitis B neihon bou anei jiu ahi, ajehchu Hepatitis B umlouvin D hi akilathei poi. Anatdan hi Hepatitis B tobang ahin, chuleh ani a aum khomleh thin nat jong akhoh deh in cancer ahilouleh cirrhosis jong a um nom deh e. Akivennading a Hepatitis B vaccine kikap ding ahi.

Hepatitis E hi Hepatitis A banga twi akon chuleh neh leh don then lou jeh akon kilatheih ahi. Atamjo amacham in adamdoh jin ahi. Numei naovop lai a akilah leh thina thei ahi. Anatna hi akijenna ding lou aum loujeh in kiventhem ding ngai ahi. Akivending dan chu twi thenglou donlou ding chuleh vaccine jong kikap thei ahi.

Vitiligo

(Tikaang)

Tahsa chung vun angoudoh ahilouleh akaandoh phatleh vitiligo tin aki-he'n ahi. Ahin hetding khat chu angou jouse chu vitiligo ahi deh poi. Ajieh chu akibahpi natna chuom jong tampi aume. Anatna hi tahsa chung a vun color hinsem 'melanocytes cell' kiti hi athi ahilouleh na atoh lou phat leh hung um dohji ahi. Mi tampi'n aheththiem lou jiehin akilamatthei natna (contagious), nehkhiehl nei, pap chang ahilouleh leprosy vei dan in agelji uvin, thetna (social stigma) aneiji uve. Thina khop hiella natna ahi lou vang in adammoho lunggel atongkha theiyin, hijieh chun society ah jachatna le lhahmahna in agelji uve. Adohlai mun ti chu mai, khut chuleh kenga a-umkhah leh (adeh-in nungah gollhangho) hiche natna vei ho hin koima'n adeilou ding in akigel theiyin ahi. Chuleh natongho jong atoh khompiho'n thetna aneiji jiehl uvin ahiding banga lolhin theilouna jong aum theiye. Ahin chutobanga lom a kithetna thei chu ahipoi. Michael Jackson, 'King of pop' tia kihe vannouiya lasa minthang pa jong chu vitiligo natna ananei jiehin ama geldoh jingna leh mijousen aheththiem

a adammoho lunggel/ tahsalam hijong leh aki thopi (support) theina ding in athi nikho June 25 hi kumsieh in World Vitiligo Day ti'n akamangji in ahi.

Vitiligo hi akijenna ding lou-leaai tampi aum vang in adamdoh mi jouse akibang poi. Hijieh achu aphatcha a kivetsah ngai ahiye. Ahin hiche natna nei jiehl a hinkho tongkha leuva aboina ding ima aum poi. Aphapen chu akipat tilla apat a jahcha lou'a vunve doctor akivetsah ganga ahileh le atamjo aki-jendam theiyin ahi.

Hetding a pha

Vitiligo hi leprosy natna veidana gel lou ding ahi. Chuleh anat dan jong achuom chuom ahi.

Vitiligo natna neiho hi pap po ahipoi.

Vitiligo natna hi akilason thei (contagious) ahipoi. Kidah lou ding ahi.

Vitiligo natna hin lunggel anopmosah jeh in aveiho hi lhamounna (emotional support) pieh ding ahi.

Vitiligo natna neiho hinkho a ima aboina ding aum poi.

CHRISTIAN INSUNG NOM

Ps.127:1 ; Gen.18:19; Eph.5:22



Rev. Paojangam Haokip
Pastor C/C Haokip veng

Sermon

THUMAKAI

Amasan muntinna um Houbung mitheng te jouse le hiche article ana sim jouse kangailut nau Huhhingpu Jesu Christa min in salam kahin peove. Chule tuchunga hiche article jih dinga lamkai ho a kon'a nganse na kachan thei jeh in amaho chungga kipa thu Pakai min in kahin phongin ahi. Article jih dinga ngan sena kachan-a pat in, ipi jih ding ham ti kagellaijin, tulai tah a kalungthim sunga kapoh nat pen tah khat chu, Christian insung tamtah insung kitoh lou le insungnomlou tah a achen hi ahi. Hijeh chun, "CHRISTIAN INSUNG NOM." kiti thupi hi chom cha a ina kihoulim diovin kahin deilhen in ahi.

I CHRISTIAN INSUNG ITOBANG HIDING HAM ?

Christian insung kiti hi Jesu

Christa aluchang penna umna mun chu ahi. Christian insung umlouvin Houbung ahangtou

theipoi. Christian insunghi Nam-pi tingpi gu ahin, chule khan-tou machal nadinga chi(salt) a pang ahi. Christian insung hi tokhom,jilkhom namun, hilai munhi Christa ngailut na a Nu le Pa kikan khom nale chate lhagao thu a kihil nale kikhoh khah namun, chule Pakai Jesu hi insunga dinga aluchang mai mai hilouva atah tah a aluchang ahi. Hilai munna hi Nule pa chule chate ho niseh a insung mite Pathen hou khomna mun chu ahi. Christian insung kiti hi insungmi member jouse kipah tah a kicholdo khom na mun, guhthim thu kisei na mun, lungmong tahle bitkeija umna mun, natoh kichuh namun,kichep na mun, taokhom na mun,chule thilgon khom na mun,khat le khat kijato na mun, thaneina kibang,kitahsan tona mun,kithu nun tona mun kitho khom tona kijil namun ahi.

Christian insungnom kiti chu Christa vah kikho doh namun, maljin kilem namun, jindot them kibol namun ahi. Christian insung nom a chu koi koi pang ham itileh; khatna a Pathen gingjing mipa, nina a Pathen gingjing minu, thum na a Pathen gingjing chate ahiove. Bible sunga Christian insung vetkah dinga phapen tah chu; Gen.18:19 hi ahi. Pathen in Abraham hi insunga alohin na ahethjeh in mopoh nalenjo cheh apen ahi.

II. CHRISTIAN INSUNG NOM ITI ISEM DOH THEI DIO HAM ?

Christian insung nom tah sem doh thei na dingin, athupipen chu, "PAKAI" ahi. Ps.127:1 sunga chun, Insa a Pakai apan louleh insa hon pan na beiya asah u ahi ati. Hilaija in ati hi abuilding aseilouvin, Insungmi (family member)ho aseina ahijoi. Hijeh chun , tulaijin, Christian insung tamtah Pakai apan tahloujeh in kinah nale kibou na in mun alon, anomjou tapon ahi. Pakai chu asa doh pa(is the builder)ahin, Ama hi blue-print sempa le main architecture ahin chule minu le mipa hi anatong(labourer) ahilhone. Pakai hi angahtup pa (chief watchman) ahin, Insung mipa hi inkot-ngahpa(gate keeper) ahi. Christian insung nomtah semdoh nadinghin, insunga Mipa Pathen ging, Minu Pathen ging chule chate Pathen ging cheh ahio angaiye. Khat pen pen hi alhah sam leh insung chu nomlou hijeng ahi. Minun Pathen ging jongleh, mipan agin louleh hitheilou, minu le mipan ging jong leh Chaten Pathen ahethlou leh insunga chamna umlou kinah najeng ahi. Hijeh a chu abon uva hi Pathen ging ahiteng uleh Insung nom soh doh thei bepji ahi. Noiija hin Pathen ging minu mipa chule chate dinmun chom cha cha ana veo hite.

1. Pathen ging Mipa (God Fearing Father):

Pathen hin mipa hi insunga dingin aluchang pen in akoijin ahi.

(Gen.18:19) Abraham chun a insung mite chu kitah tah in analam kaiye ti akimun ahi. Insung mite chu; ajinu, achate chule asoh ho ahiove. Eph.5:23 sunga chun, Christa Houbung luchang ahibanga inneipu jong inneipi luchang ahi ati. Hiche hi Pathen thupeh order ahin, koi tobang insung, Pathen thupeh letun hochun Pathen thilgon asuh keh ji a chule insunga kipa na jouse jong chu asuh set ji ahi. Noah hin a insung mite jouse sochat na kong sunga chun apuilut tan ahi. chutobanga chu mipa ten jong, iji ichate sochat na hong sunga ipuilut dio hi imopoh nao len pen ahi. Job in a insunga dingin jingkah seh leh maicham asem jingin ahi, hiche banga chu eihon jong isem dio ahi.

2. Pathen ging Minu (God Fearing Mother):

Proverbs 31:30, sung chu ivet leh, Pakai ging jing minu pachat achan na akimun ahi. Vannoiya milen milal iti hohi milungset them minu pha khat le ni a kon'a hung kispdoh jio ahi. Minu hohi insunga dinga nei le gou manluta tobang ahiove. Minu kin thupipen tah chu Christa hi khat na a akoi ding chule ajendinghi ahi. (Lk.14:26) Ani na a aduty chu ajipa thu a nungding ahi.(Eph.5:23) Sara hi vetkahding phapen ahi. Sarah chun Abraham chu Pakai ti a akou ahi.(1 Pet.3:6) Tulai inneipi hodinga vang thil hahsa tah vang

ahi, hijongle bible thudungjuija abollou leh amanu hin Pathen thilgon banga Pathen kipa nale lunglhaina hidoh jou lou ding ahi.

3. Pathen gingjing Chate (God Fearing Children) : (Eph.6:1-2; Ex.20:21)

Chate a dinga athupi pen hi Pa-kaiya nule pa thu a nundinghi ahi. Vetjui dinga phapen tah chu Isaac hi ahi. Ama hi apa Abraham in pumgo thilto-a todinga athagot changeiyin jong paolou hellin apa thun anungjengin, akigo nading thinglom chu aki-putin thip chet in anung ajuijin ahi. (Gen.22:9)Hiche tobanga chu chaten jong nule pa te thu-a nun ngai ahi. Ipi jeh a chaten nule pa thu angai dio ham? ti hi point thum tobang ana ve kit uhite.

Thu a-ngai na dio ajeh ho:

(a) Nule pate hin chate hi ngailut chungnunga ahebol jeh u. (Parent's love and care):

Pathen hin mihem tehi alimle amella asema alungset banga hi nule paten jong chate hi angailutna alungset ahi. Atahsa le athisan a kona hungpengdoh ahijeh, chule lampi tamtah a akilo na jong um ahi.

Nu oisunga a ikijilla patna inuhin phatah a damthei na dingle khan-let thei nadinga eina khohsah pan ahitai. Genthei taha a oisunga lha 10 jen eina ko ahi. Anpha pha eineh sah a damthei na dinga lou

le ai einehsah, leiset na ihungpen lhah a patna hi VIP khat tobanga eiki jen ahi. Nule pa te hin chate dinga angaicha jouse abolpeh jing ahi. Damlou teng, lekhasim nading, nihchen ponsil avatjouse abolpeh ahi. Chate dinga thi-ngam'a pang ahi.

(b) Nule pa thupeh le hilna hi lungset na thengtah a kon ahi. (Parents commands and instructions are from genuine love).

Nule Pa a kon'a kihilna le kipho na hohi phatlhem natoh kihal louhel, ngailutna thengsel a kon ahi. Hijeh a chu, ama hohin hiche hi bol hih in, bollin ati hohi achate phat na ding jenga aseiyu ahi. Loi le gol hovanghin abangkom leh ijou lhep jio ahin, ahin nule pa ten vang achate ajoulhep ngai lou ahi. Hijeh a chu chate hin nule pate hi phatah a jana-peh ding, athu va nun ding ahi. Thuchih bu 3:1-2 sunga chun,

nule pa thuhil nachun, chate hin nikho atamsah thei, asot sah thei chule phatthei na thalhingset na apeh theidin aseiyu.

(c) Chate hi chihna hetna lhasam ahiove. (Children lack wisdom and Experience) :

Chate akikhanlhith hojeng-jonghi hetnale chihna lhasam ahiove. Lekha lama themtah himaithei, ahijengvangin hiho jong chu lhasam ahiove. amaho kigellin athemle achingin akigel-lun, mijalou nale ama changa kisonga nule pa thu a nunglouva thanga ohden a hahsatna munna lhung atamme. Chaten hetdinga khoh tah khat chu, nulepa thu ngailou hi achunga sapsetna lhung ding ahi tihi bible a kicheh tah in akimui. Proverbs 30:17- ... "Mipa mitche kehden na minu thu a nunglou chu phailaiya vaah ten akilodiu, muthonghon along aneh diu ahi."

Thukhum khana

Chistian Insungnom semdoh na dinga lolhin na thuguh chu, Insung Maicham hi ahi. Hilaija hi Christa insunga aluchangpen hina peh jing ding. Ani na thuguh chu NGAILUT NA hi ahi. Maicham regular tah a sem jingding chule Ngailut na a chu insung mite kikan khom jingding ahi. Chuteng tah chuleh Christian Insung nom kistem doh ahi tai. Asim jouse Pathen in insungnom semdoh na dingin phat thei boh taken. Amen

KIKHELNA

KAHINKHO'A HI

EPIKAKHEL NGAIYA HAM

2 Tim. 4:11; Philemon 11

Pastor Khupjoyful Singson
Pastor, Gambih No. 13

Sermon

Tulai'n mitin in khantou/machalna hi a ki ha boipi lhez jeng ta'n boipi dia lom mong jong ahi thouve, ahin eti iboipi ham tihi apoimo khat chu ahi. Kikhelna hi khantou machal kipatna ahi kiti le jou ding in kagel poi. Apha lam'a kikhelna um lou in thil ho chu abang hijing in tin ima jouse chu amachal lou hijing ding ahitai. Chule, mi jouse'n khantouna le machalna edei lhez jeng nauvin ahin kikhelna kiti chu aumlou leh lhung jou deh di'n kagel poi. Tahsa thu a sei di'n khan-touna chu idei ngal ahi a khangtouna lou a ikihet tah leh inn-chen sem dan, sum le pai hol dan, cha le nao sem dan le adang dang ho ikhel ngai hitante. Chu tobang ma chu i Christian hinkho a jong angai chan ahi.

Ahi leh kikhelna chu ipi hiding hitam? Tuni'n, hiche kikhelna kiti chu alui/ahoi lou akon ahoi/apha jo cheh a mipi ahi lou leh chang-val a kipuihoina ding chu ahi tin ana sei ju hiute. Ipi iki puihoi sah em (alui/athah, apha/aphalou? Etc.) hichun ihinkho amachal sah ding ahi. Christian hinkho hi kikhelna ahi kiti leh kisei-val lou ding ahi, ajeh chu iBible in alui akonna athah a kikhelna chu ahi ati e (II Cor.5:17). Kikhelna hi

adeh in iChristian hinkho ahin Christa-dungsun ihi theina din angaikoh lhez jeng in ahi. Chon leh khan, neh leh don, thusei la-sah ahoilou ichin ho chu ahoi leh akilom (Christa hinna thupha toh kitoh-Phip. 1:27) a ikhel teng tah leh Christian hinkho a machalna chu um tante ti tahsan aum e. Noiya hin Bible a imu mini hinkho ana veu hite.

1. **Onisemus:** Onisemus hi Colosse a um mi-housatah leh

Houbung sung a jong jabolna chang Philemon soh pa ahi (Phil. 1:16). Amin hi "Phachomtah/Sinthei um" tina ahi. Ama hin apupa thil (sum) ahin guh a Colosse dalha a Rome khopi ana jam lut ahi-tai. Hijeh chun, amin phachomtah chu a suse in migucha asoh doh tan ahi. Hiche migucha pa hi solchah Paul toh Rome khopi ah ahung ki muto kha khelkhel hon in mi-vangpha pa ahung hikha kit tai. Ajuh chu, mitheng Paul thuhil akon in Christa ahin kimu chen in tu'n amin Phachomtah chu dihtah in anei tai (Phil. 1:11). Onisemus in agutjon akhel in kitahna toh alhet tah jeh in apupa kom ah amin "Phachomtah" chu ana tong doh jou tahih jong leh tu'n mi-phachomtah asoh tai.

2. Mark: John Mark ti a jong kihe, ama hi Jerusalem a cheng Mary kiti nu chapa ahi (Acts 12:12). Barnabas tupa (Col. 4:10) ahi jeh

in khohsah leh son tah in Paul leh Barnabas in Missionary kholzin masa pen ah chun ajenle lhon din ana kipui hon e. Kitahna/gunchuna neilou iti ding ham jeh chun Perga (Pamphylia) aphah un ana kinung le tai. Hijeh chun kholzin nina ah chun Barnabas in puikit ding ati chu Paul in ana jahda jeh in akinel sang hon in akikhen lo lhon tai (Acts 15:39-41). Ahin, khonung in Mark chu Paul din manchahpha tah (col. 4:10; Phil. v24), ngaichat lenpen (II Tim.4:11) ahung hin, chule Peter toh Babylon ah missionary'n ache hon in Houbung tamtah jong aga tung doh hon e (I Pet. 5:13). Tradition in Mark Egypt gam a ache'n Alexandria Houbung atung doh in Nero lal kal kum sagi lhin in Christa jal in engbol leh tha in aum tai ati. Phatkhat a din Mark chu sonlel mel pu hijong leh kitahna a akhel tah jeh in phachom tah ahi kit tai.

***Christian tamtah machal thei lou ho khu
ahinkho uva kikhel nei nailou ho, jong (Monkey) in
um(gourd) sunga aneh ding akhut dimset asip leh
ageija akhut kiteh, hichu lha leh ong thol tading,
ahi'a lhanom lou ho tobang ahi nom jiuve.
Onisemus aguchat chule Mark in akitahlouna akhel
jeh lhon in mipachom tah cheh asoh hon tai.
Mihem hinkho, adeh a, iChristina hinkho a khel ding
inei houhi aphant chan khel leu hen machalna chu
muthei jin hung kilang doh ta'n te.
Sopi, nang in ipi khel ding nanei jem?***

Asim jouse Pathen in phatthei boh cheh taken.

Mission Column

Tripura Mission Field hondoh hita.

Achesa nikho 28th June 2019 nichun Pu S.Athang Haokip Mission Board Chairman to Dhalai District Tripura gama Mission Field hongdoh din kanakalsong hon in ahi. 1:05 pm in Imphal Airport a kon kana lengdoh lhonin ahi. Nilhah lam 2:00 pm in Agartala kaga lhung lhone. Saisom Sajai Baptist Association Executive secretary in office gari eihin solpeh lhonin Airport a kon eihung laovin Agartala Baptist Mission Centre kaga lhungtaove. Nilhah lam 5:30 pm in SSBA lamkai setoh meeting kana toukhom un Mission natoh khomnaa agreement chung changa kihoulimna kana neikhom un chule point phabep kinop to na akinei jou vin Memorendum of Understanding (MOU) kum 5 sunga tokhom nading signed kabol un ahi. Meeting kichai 7:00 pm in Rev LT Gangte in amagari a eihung lakit lhonin aumnao Mission field office Lafunga muna kagalhung taovin ahi. Inneipin kipah tah in eina lam touvin chujouvin kakisiltheng un nilhah ann kane khomun kaki-houlim un kipah tah in kaki choldo taovin ahi.

Ajing 29 June nijingkah in Sir kamthang Haokip Head master Synod Evangelical foundation English School principal in jingan nedin invite eibol lhonin kipah tah in jingan kaga neovin ahi. Hiche School hi class X chan ahin infrastructure lhingtahleh school kivaihomdan hoitah agama dingajong minphatah Mission School chu ahitan ahi. ESC ministry jallin Pathen ithangvah uve.

Sun pung 12 ahung gin nin Rev Parimal Kaipeng Executive Secretary SSBA in eihung lapa lhonin Kamalachara Dhalai District kana jon taovin ahi. Nilhah lam pung 3: velin kaga lhung uvin chujou vin Raipasa mun a Evan. Satya Basa koma kagageh lhonin ahi.

Ajing jingkah 8:30 a m in hilai muna um Evan. Seikholen Guite le Evan. Basa in aboipi namun hon achun Christian ho toh houinn kaikhom na kanei khom un mi 49 kakikhom doh un ahi. Pathen vahchoi la sahhom nale chapang ho lamle lasah khom na nomtah kanei khom un ahi. Houinn kai kikhen in mipi chadon khom na kanei khom uve.

Tripura Dhalai District a Pathen na itoh chung chang u seikhom na akinei jin maban toh gon ho seikhom na jong akinei khom in ahi. Nilhah 4:00 pm in Kamalachara houinn a kaikhomna kanei un Pathen thu kasei jin Convention Mission Tripura a ministry boldia akihung dan hilchet na kanei jin chule tualhah KBC Mission Field hondoh ahitai tia phondoh nale taona kamang in chute chun 30th June nihi Tripura KBC

Mission field kihon doh nikho chu ahung hitan ahi.

Nilhah kaikhom na kichai jin kipah tah in Rev Parimal le inn sung miten anneh tuidon hoisel eisem peh un kipah tah in ann kane khom un ahi. Ann neh jou vin khosung houbung pate ho ahung kikhom un Mission natoh chung chang kihoulim na kanei khom un ahi. Kumsunga SSBA mission share ijat ham tin kadong in ahileh Rs 50.000 (fifty thousand) ahi atiuvn kajah khel ham tin kadong kit in ahileh Executive Secretary pun Rev hichan hi kaphah nah lai u ahi atin hiche jong hi tukuma bou hung kikoi pan ahi ahin tin ahi.

Mission natoh athanop nao aseidoh un kenjong “nangho koma Missionary hung ding bou gelhah un nanghon jong soldoh ding ngaito taouvin, chutieleh Pathen phatthei nachan dingu ahi tin katil khouvin eiho Mission natoh na a income hoipen a ineiu Missionary box ihon uva hung lut suma Mission na itoh dan u kasei peh in abolje dan kahil in ahileh akipah lneh jengun Association pumpi a tukum a introduce bol pat tah din along gel u aphonng doh un ahi. Iti hama Association level a tohgon hi alolhin jou tahlou jong leh Kamalachara houbung in 2020 kuma pat a apat Mission natoh apat tah diuvn deisah na lung gel aseidoh un ahi.

Pathen in Tripura Dhalai District a anatong dia eisol uhi ajeh umtei ding ahi. Missionary isol uva houbung itun ding keou hilou va amuna houbung ho mission natoh na ding introduced boldinga jong Pathen akon nganse chang ina hieve.

Ajing jingkahe pung 6:00 in breakfast kane khom un 7:00 am in Agartala lam jon din kahung doh kit taove. Agartala pung 10 in kahung lhung hon tai. Airport a control manager Pa Jempu Haokip in annekhom din invite eibol lhonin kipah tah in a quarter a kachao vin ann tui tah kaga nekhom un ahi. Chujou vin Airport a Air Control Room a kaga kaldoh un vanleng iti guide abol uva kimang hiuvam ti ho kaga veovin ahi.

Pa Jempu khangdong cha a Agartala Airport apoh jeng hi kuki te dinga kithang att um tah ahi. Agartala khopi sunga jong Kuki chaten aphot chom pi tah leh amon pi tah officer ahin Pathen in damna pejing henlang atoh na a jong lolhin na pejing taken.

Pung 1:00 pm in Agartala Airport akon kahung lengdoh kit lhonin nilhah lam pung 2:00 in Imphal tolpi kahung lhung hon tai.

Damsella lolhing tah a Tripura Dhalai District a Kuki Baptist Convention Mission in Mission Field ihon doh thei tah jeh un Pathen ithang vah uve. Evan. Seikholen Guite, Evan Satya Basi Molsom chule Evan

Lalhminghthanga Kuki hiche field a mopo ahiuve. Hiche mission field hi akhantou va alolhin thei jing nadin itaonao vah geldoh jing ute.

Saijang Karbi Anglong Assam a Baptist Mission School khat phunding toh gon chelha jing.

Achesa nisim 15 July nichun Saijang kho Karbi Anglong Assam a mission tohgon na noija hung kichepi jing English school khat phuding to kisai jin agam leiset khonei haosapu toh suhtup na akinei tai. Gamleiset kichoh to na soi akikai jin KBC office lama kon in pu S. Athang Haokip Mission Chairman le Rev Henjalen Doungel Mission secretary in sign abol in chule amaho lama kon in Pu Demthang Kipgen khotol haosapu agam neipa le Pu Ngamkholun Kipgen Insung Mi upa hinan soi abol lhonin chule aheto din Gambih pastor Seiminlen Haokip le gambih Chairman pu Nehsei doungel chule lhang haosa ni Pu Jangmang Kipgen Chie of Khoding le Pu Lamseh Kipgen Chief of Molsang in hettou na soi eikai peh un ahi.

Lhangsung Education gelkhoh na jalla Saijang Haosapun gamleiset pari ni manbai tah a eiph nao banin akitedoh gamleiset in ahop-lou gambeh neokhat leiset kitena line apat tua achen nao khosung boundary chan man beijin ngailut thilpeh in eipeh be kit un ahi.

Hiche gambeh Haosapun eipeh benao hopsung khosunga kona School Campus sung lutna veilam main measurement kilah nakah se hi KBC Gambih no 18 in Gambih Office akisah uva pansat na a anei divin KBC Mission Board in peh doh na jong ahung kinei paingal in ahi. Gambih in Ankong sokhom na kin eigon peh un thil jouse aphalam pena chai ahitai. Pathen in hilai muna hi alengam na lungnachim tah a itoh thei nadiu vin phat thei eiboh jing taohen.

Mission Conference 2019 to kisai jin houbung vilna akinei jinge.

Mission Conference 2019 ahung lhung ding November 14-18 sunga Convention houbung jouse pan lah na a boltah ding ti tohgon akinei to lhonin alolhin thei nadin KBC Mission Board in houbung ho vilna akinei jing in ahi. Sunday ni houin kaikhom na leh sunkah a houbung ho thangkou na akinei na a akivil houbung hon thanop na aneiuva atamthei pena hung pangdinga akigot nao aphongdoh un ahi. Mabana jong hiche houbung vilna hi jochan a hung kinei jing ding ahin houbung jousen kipah tah a ahung ding Mission Board hole Evangelist kinganse ho ina lamtou va chule hiche Conference lolhin nadinga hi sumle pai lam huihen ipilam hijong leh pan kipah tah a inalah cheh diuva Pakai mina temnajong kahin nei kit ahi.

Mission Board member hon vilbe dinga hung kigong houbung ho tah lang na ahung kinei je.

Name Houbung & Gambih Anikho

1. Rev Henjalen DOUNGEL = *Molnom B/Church (16) & Chahmol B/Church (16) (11-08-2019)*
Pu Onmang Haokip = *K.Songlung B/Church (7) & Khoken B/Church (7) (18-08-2019)*
2. S.Athang Haokip = *C/C Haokip Veng (1) & B/C Chassad Avenue (1) (11-08-2019)*
Pu Haojakam DOUNGEL = *Kulbung B/C (9) & M.Lambulane B/Church (9) (18-08-2019)*
3. Pa Thangkholun Haokip = *Lonpi Khonou B/Church (21) (10-08-2019)*
Pa Neka Vaiphei = *Lonpi B/Church & Khopijang B/Church (21) (11-08-2019)*
Pa Haopu Singsit = *Chahkap B/Church & Tuilelon B/Church (21) (12-08-2019)*
= *Saitu B/Church & Phoibih B/Church (4) (18-08-2019)*

Hiti ahijeh hiche chung a kipe nikho a hin houbung villa hung ding lamkai hohi kipah tah le thanom tah a ina lamtou va Pathen thua a kikhop khom pi na jong inanei diu vin temna ahung kinei je.

Mission field transfer and posting

(a) Pheidinga Mission Field.

Vangset umtah in achesa 15 Jan nin Pheidinga Meitei Mission field a mopoh na la Pastor Loken Singh in tahsa damo jehin eina dalha taovin atoh mun hi Rev Ibomcha Meitei Field Suprvisor pa anakivetsui sah in ahi. Hinlah supervisor khat in field khat phatsot tah avettha ding aboina aumtah jeh in hiche field muna hin Evan Paolam kipgen chedin Mission Board in anakigong in amajong kipah tah in 7th July (Sunday) nichun thanom tah in a Field thah a hin analut tan ahi.

(b) Pukhao Naharup.

Pukhao Naharup a mopohna anala Evan.Z.Khupthang chu amaho insung Koireng sub tribe a kiloikhom sen Baptist Association khat semdoh ding toh gon ahin nei phat un insung Pathen natong jouse pan lah khom ding tohgon ahin nei taovin ahileh eiho Evan Khupthang jong man nanom ahin neitao vin hijeh chun aman jong KBC Mission field a Pathen na atoh jou tah lou ding jeh in application ahin sep in hichu Mission Board in akiven dinmun dung juijin KBC a kon lha ong na anakinei tan ahi. Aman atohna mun chu aong a ahung um tah jeh in amakhel din Evan. Lamthang DOUNGEL akisol in aman jong kipah tah in 7th July nichun Pukhao Naharup muna mopoh na alatan ahi.

Chunga kipe Evangelist teni hi anigel Ihona Meitei field a tong kh-alou cheh ahi honin hamle paolama kisonlal na lentah aneigel hone. Hijeh chun anigel hona amopoh nahon muna hi lolhing tah a apan jou hona houbung miten tahsa le lhagao va phatchom na aneitheh cheh nadiu vin itaonaovah anakop jing u hite.

KBC Missionary family chanu khat ikibe taove.

16th July nichun Arunachal Mission Field Supervisor Pastor Nabin in chanu hoitah khat Tezu Government Hospital a damsel in ananei kit tan ahi. Operation na aneiu ahin naosen le anu anigel lhon in adam cheh hon nai. Mabana jong adam theng hona Pakai adia Arunachal gama hattah a itoh jing thei nadiu vin anule acha chule Pastor Nabin adin itaonao vah gel doh jing hite.

Tahsana hongsungu hunglut thah

Achesa nisim 13 July 2019 nichun Sirou Nepali Mission Field a Christa tahsana Baptist chang mini Manipur Nepali Mission ield a ina nei be kit un Pathen thang vah na ipeuve. Rev Jeeten Gajmer le Evangelist Prem Thapa in Pathen thu asej peh hona a kon lhagao dinmun ki-hetchet na ahin nei hona Christa tahsana amani nopna tah a tahsan Tuilut na ananei lhon ahi.

Tukum sungin Manipur Nepali Mission field hi amachal l'heh jeng in Missionary ho tompan na jalle Pathen pan hunaga muthei in aumjing e. Mabana jong Pathen in lolhin na eipeh jing nadiuvin itaonao vah geldoh jing u hite.

KBC Missionary Revd. D. Athang hinkho abeitai

Late Revd. D. Ngamkhothang Haokip hi Feb 25, 1961 kum in Chassad kho ah ana peng ahin, 1st July 1988 kum hin KBC a ding a Nepal gam a missionary masapen in anakisol doh in ahi.

Aman atoh sung in 1988-2008 kum sung hin Nepal field Co-ordinator khat hinan na anatong in 2009 apat tukum 2019 athini chan hin Siliguri Field Co-ordinator in ahung pang in, vangset umtah in dammona ahinneitan Siliguri hospital ah anakijen in hinlah damdoh jouta louvin nisim 21 July 2019 nikhon eina dalhataove, Aman eina dalhah na chung uvah hin KBC thalheng in Mission Board Chairman leh Mission Secretary, Pu S. Athang Haokip leh Rev. Henjalen DOUNGEL ana kalsong lhon in boina tamtah umjong leh Pathen lungset in Siliguri achenna mun a along kivui aga lap lhon in seiding, bolding a kilom ho jouse aga bol theilhon jeh in, achung lhon ah KBC thalheng in kipathu akiseije. Pathen in KBC mission na itohnao maban ah jong phatthei boh taken.

- General Secretary, KBC

Men Column

THINGPHUNG (SAPLING) 2000/- VAL ANA KIPHUT DOHTA,

Date 5th July, 2019 (Thursday) nin 70th Vana Vanmohatsava Celebration India, leh Manipur Govt. Forest Dept. tohgon nanoija Mass plantations programme chu Men Department kbc leh Development kbc kitho khom min Lom resource centre munna MI 150 vellin, thing keh (saplings) 2000/- valjen akiphut doh tan ahi. Heche toh gon lolhin thei nading nga pan hung la ho alhang pi in kahin tah lang nge: KBC Office akon nin Rev. Dr. Thongkhosei



haokip lamkai na in Office a secretary ho sese toh staffs sese ahung kon uvin chule Gambih leh Centre church phabep khat na kon nin a pastor

hou lamkai na in ahung kon uvin ama hochu: (a) Centre church Kangpohpi, (b) Centre church S.Salem Sapormeina, (c) Centre church Leimakhong ahi uve. Gambih pastor pa lamkai na akonna hung kon ho: (a) Gambih no.4, (b) Gambih no.19, (c) Gambih no.7, chule Gambih no.5 le Gambih no.1. Men chairmen pu, Achung a hung kimin phah ho jouse ha pan na jalla lolhing tah a natoh kimachal ahi jeh in achung cheh uva kipa thu sang tah Men Department KBC thalheng in ahung kiphong nge, pathen nin athipha abolna chung uva phat thei boh jing taohen.

HETSAH LE TEPNA

34th Council Men Department kilolna no. 4.34.2019.

39th Annual Assembly 2019 leh 2nd Gospel Olympic hi Lom resource centre mun na bolding, Gambih jouse Camp ma lhunsoh keiding ahi je in, Camp chungkhu na ding Turpaulin ahiki poh cheh ding ahi e.

Aphat hi 3rd – 7th, December 2019 sung hiding chule 3rd December 2019 ni 11: am leh lunkim soh kei ding 11: 30 am a opening program kipan ding ahi. 7th December 2019 ni leh closing programme umding akichai chai leh kikheng ahi e.

LOM RESOURCE CENTRE

Ahung lhung ding 15th September 2019 ni hi Lom resource centre day ahi jeh inna man cheh uva eima eima ma Houbung in Programme anop na thei chan na e kigon dio vin kahin tem uve.

Secretary, Men Department

Women Column

Lydia hung vil ho

Prescilla Centre Guwahati : Achesa nisim 10th July 2019 nikho hin CML/ Prescilla Centre Guwahati ten Lydia Ponkhong ho sponsore abol nao



kumthum ahung lhin ding toh kilhonin, Miss Chaya Momin. Assistant Manager makai nan mi li in Lydia vilna ahung neijun, kumthum sunga tohkhom na lam a kihou limna leh Financial support phat abeinunga iti lam a tohkhom dingham ti thua jong kihou na akinei khomin achunguva kipa akiseije.

Rev, Dr Hegin le aloinu

10th July 2019 nikho hin Rev, Dr Hegin le aloinu Hevei in Lydia ahung vil lhonin, Chapang hon a neh khom diuvin mechoh na din Dangka 1000/- apeuvin achung lhon a kipa thu akiseije. Pathenin phat thei boh jing lhon taken.



C/C Hill Town Nute



Nisim 13th July nikho hin KBC C/C Hill Town Nute hon Lydia vilna ahung neijun, ngailut thilpeh in Rs 2000/- jong ahin pouvin, chule tilkhon nale taopeh na jong aneijun achunguva kipa thu sangtah in ahung kiseije. Pathenin phat thei bohjing tao hen.

Maohing Baptist Church

22/7/19 nikhon Maohing Baptist Church KBC Gambih no.5 Houbung staff ho le Gambih Pastor pu Pastor Lunjalen khongsai in Lydia Resources Centre til khouna, thilpeh le taona in ahung vil un ahi. Thilpeh chu Potatoe bag ni le Rs. 1000 ahi. Kakipah uve Pathen in Houbung mite jouse le Gambih Pastor pa phatthei naboh taohen.



35 CHAN NA WOMEN COUNCIL KICHAITA



Pathen lungsetna jallin nisim 25th July 2019 Thursday nikho hin KBC Assembly in Council neithe kit tadinga kiphat sahna akinei bangan, Kumli jouvin Women Council 35vei chan na chu lolhing tah in Council member mi 58 kikhom doh in akichai thei tan Pathen ka thangvah e. Kumli sunga Council neitalou akihi jeh in athah a ahung kitou kit chu lung kidan jong aumin thanop jong aumin, Gambih No 15, 18, 20 hichenghi absent ahiuvin, adangse vang ahung cheh un achung cheh uva kipathu akiseije. General Secy, pajong boi l'heh jongle ahungjao thei jeh in kipa aumin, Rev.Dr Hegin le aloinun jong nute ngailut na jalla phat chom khat hijongle eihung tou peh jeh un kipa aumin chuleh Ex-President Pi Boicie le Ex- Secretary Pi Lhingbem chule Pi Chingboi Child Evangelist amaho cheng tomngai tah a achai chan geija ajaothei jeh un achunguva kipa thu akiseije. Pathenin ikiloi khomnao KBC ahiddeh in Women Department phat thei bohjing taken.

Miss. Lhingjanem Haokip, *Secretary, Women Department*

Youth Column

BQ 2019

Bible Quest 2019 Application Form ana kilah hojouse hetdinga pha chu ahileh

Application Form submit nadinga achaina nikho chu September 5 ahin melchih jing ute. Hiche nikho jouva office a hunglutho kila talou ding ahitai. Gambih lamkai jousen aphant chan hin thahlut cheh din temna kahin neiyeh.

Admit Card chu exam nikho leh nahin kichoi cheh diu, Admit Card neilouho exam bol kiphallou ding ahi.

YOUTH CONNECT 2019



Tukum Youth Connect kigonghi KBA Nagaland Youth le KBC Youth in akhatveina a dia agonkhom ahijehin thanom tah in pang gou hite.

Gambih jousea Youth member jouse pangcheh dia kigong ahin, Youth jouse thonlouva hungpang cheh dinga kigong ahi. Nagaland KBA Youth hojong mun gamla tah a kon a mi 200 alhom pen a hungdiuva kigotna anei uve. Eiho amun a umhon Gambih khat a ijat ihung joudiu hinam?

Youth Connect a hi gena, mattress, thing le twi kitup tah a kigong di ahin hinla neh le chah, umle bel ho eima gambih in iki ngaito diu ahi.

Youth Connect T-shirt



Gambih jousen kichoh cheh dingin jong temna ahung kineiyé.

KARBI-ANGLONG YOUTH CAMP

AUGUST 1-5, 2019 sunga hi Amrajan Mission Center mun a Karbi Anglong Youth Camp umding ahin, hiche hi KBC Youth Department in sponsored abol ahi.

Speaker hi Rev. Lettinlal Chongloi ahin, Devotion jouse hi Rev. Lunjalen Khongsai in alah ding ahi.

BIBLE QUEST

EXAM NIKHO

13 OCTOBER 2019,

SUNDAY

11:00 AM TO 1:00 PM



YOUTH CONNECT NIKHO

3-8 OCTOBER 2019

Amun:

Khumanlampak Stadium, Imphal

Literature Column

Convention Level Sunday School Competitive Examination -2019

&

New Testament Scripture knowledge Competitive Examination -2019

Senir 1, Senior 2, pilhing class ho kumlhun Convention Level Sunday School Competitive Examination - 2019 le New Testament Bible/ Scripture Knowledge Competitive Examination 2019 ding thu'a avel'a hetsah'na.

Sunday School Exam.

- i) Senior 1 : Bible Pumpi Thumakai, by Rev. Onkho Haokip
- ii) Senior 2 : Christian te Tahsan Kihilna, by Rev Silas J. Haokip
- iii) Pilhing : John Henga Thuphondoh (Revelation),
by Rev. Haoneo Haokip

Bible/ Scripture Knowledge Examination: (New Testament Bible - Mathew to Revelation)

*Exam teni nikho : 1st December, 2019 (Sunday)

(Session 1 - Sunday School Exam.

Session 2 - NT Bible/ Scripture Knowledge Exam).

*Application form submit bolna phat ageipen'a 30th September, 2019 (Tu hi Application Form akilha jing lai ahi).

Application form man

- i) Sunday School Exam form Rs. 100/- (Rupees one hundred) only
- ii) N.T Bible/ Scripture Knowledge Exam form man Rs. 100/- (Rupees one hundred) only

** Sunday School Exam bouva pang ding hon Sunday Exam form bou akilah diu; N.T Bible/Scripture Knowledge Exam bouva pang ding hon N.T Bible/ Scripture Knowledge Exam form bou akilah diu; ani'a pang nom hon ani'a ding'a form 2 9 (Rs. 200/- a) akilah ding.*

Exam Centre

1. Imphal, 2. Sapormeina, 3. Chassad (Kamjong Dist),
 4. Churachandpur 5. Sugunu, 6. Pallen Molnoi, 7. Moreh
- (Exam centre hi nangma hitheina pending mun nakilhen ding ahi)

Application lah'na ding

1. KBC Office :

- i) Rev Haoneo Haokip, Secretary, Literature & Publication
- ii) Ms. Nenga Singson, Clerk, Receive/ Receipt & Issue

2. Eima tah Office'a ihung jou/man loule application form man ihin peh'uva gambih pastor/gambih lamkai/ houbung lamkai/ Office hung pha thot thei/ nganse theidang dang ihin nganse theiyu ahi.

**Sunday School themvet'na hi niengkum/ kum masa (2018)'a bang'a houbung'a kon'a gambih, gambih'a kon'a Convention Level pa chu hitalouva, koi hile Convention Level Exam a pang nom chan'in mun aneitheina ding'a apang nom chan'in Application form a direct a apply abol'a pang thei ding ahi.*

**Hiche Exam teni'a ding'a Application Form lah'na ding le submit bol-na ding phat kipe (ageipen'a 30th September, 2019) kichai nung'a apply bol phal hitalou ding ahi; ajeh chu, phat kipe sung'a submit hinbol ho'a ding'a bou question kistem/ kitat'a kigong tup ding ahitai. Hijeh chun, apang nom jousen phat kipe sung'a hi application nakilah'uva na-submit cheh diu ahi. (Application form a apply bol lou Exam a pang thei lou ding ahi).*

Hiche thu anasim doh gambih pastor, gambih lamkai, houbung lamkai, Sunday Cchool superintendent, Sunday School jilkung hihen koi hijongle KBC Thuso anasim'a hiche thu anasimdoh jousen athu hi nahsah mo le im-mang bol loubeh a, houbung, houbung'a Senior 1, Senior 2 le pilhing Sunday School simlai ho thonlouva inaseipeh'uva inahet sah tei tei diuvin Pakai minin tem'na le taona ahung kinei kit in ahi. Adeh in gambih pastor ho le gamkai lamkai hon inakhoh sah'uva igambih sung'uva houbung miho thonlouva inahet sah teidiuvin Pakai minin temna le taona ahung kineiyn ahi.

Hetchet theilou thu'a kihet to'na thei contact No. 9089593092/ 7005525033

Rev. Haoneo Haokip
Secretary, Literature and Publication, KBC

Gambih No 4

2nd Saturday Anngol Taona



Achesa nisim 13th July, 2019 2nd Saturday nikho hin, Phaijang Baptist Church No. 4 mun a a 6vei chan na Gambih Anngol taokhomna Programme chu mi 200 kikhom doh in lolhing tah in anakimang chaitai. Kiman chah na ho NI. Kimboi Haokip, Chairperson No. 4 Conduct hi na in Khonei Youth hon Pathen vahchoina la ngeitah asaovin, Pathen thu a houlim na Rev. Onthang Haokip, Education Secy, KBC in thupi: **'Nangho vannoi vah anhiuve'**. Mat, 5:14 mangcha in ngainom umtah in thupi aseijin, chu in mipin taokhom na in akiban jom in kipah tah le thanom tah in a 6vei chan na taokhom na Programme chu akichai theijin Pathen thangvah aume.

Pakaija natoh khompiu,

Pu Dongkhosat Haokip,
Chairman,
Gambih No. 4

Gambih No. 11 July lhasunga tohdoh ho Taokhomna



G. Khonom Baptist Church munna June 8 nikho in Pastor Tingoulen Haokip, Centre Church Sangaikot Speaker hina le Rev. Onkho Haokip, Gambih Pastor Resource person hina in Gambih An-ngol taokkhomna le kiloikhomna lolhing tah in ana kibol in ahi.

Twilutna Kin



Gambih sung'a tahsan twilut akibe jing toh lhon in, tahsan twilut akibol jing in ahi. H. Gamnom Baptist Church munna June 16 nikho in mi 8 ana lut uvin, G. Khonom Baptist Church munna June 25 nikho in mi thum chule Zangmun Baptist Church munna July 28 nikho in mi 5 ana lut uvin ahi.

Minu Mipa Camp

June 14-16, 2019 sung chun H. Gamnom Baptist Church munna Rev. Onkho Haokip, Gambih Pastor Speaker hina in MInu Mipa Camp lolhing tah in ana kibol doh in ahi.



Gambih No. 11 Center Gambeh kichohbe

Gambih in Gambih Center kehlet ding deisahna anei toh lhonin July 16, 2019 nikho in Gambeh khat (36 x 100 Fts.) Rs. 2,50,000/- in ana kilamdoh tai.

Pu Tinthang Kipgen,
Chairman, KBC No. 11

TEENAGER CAMP LOLHING TAH A KICHAITA KBC CENTRE CHURCH KANGPOKPI



Mi namkim ka anga disu cheh ding ahi. Rome 14:11

Thupi mang chan achesa 27-30th June 2019 Sunga Kangpokpi Centre Church mun'a Camp lolhing tah in akiche lhan ahi.

Speaker:

1. Rev Lettinlal Chongloi
2. Rev.Lamkeng Lhouvum

Camp Director: Mr. Haoneo Baite.

Camper ho mi 130 ahung pangin, group 4 in kihom khenbin anom lneh jenge.

Hiche camp hi Houbung women Department in sponsored eibol peh u ahi.

Khangthah tampin hinkho kikhel na aneijun chuleh mi 12 ho Jong Tuilutna I kin akinei peh tan ahi.

Pathen in khangthah thah ho phat thei boh Jing ta hen.

Rev Lamkeng Lhouvum
Church Pastor, KBC Centre Church Kangpokpi.

Gambih No. 12 Anngol Taona

Nisim 29th June, 2019 Saturday nikho hin KBC Gambih no.12 in Khomun-nom Baptist Church mun a Gambih Youth Department mopoh-



na in Anngol taona akimangin, Gambih sunga Houbung muntin a konin mi 259 aki khomdoh in, jingkah 8:00am apat in nilhangkai 1:30pm chan programme kitup tah in akineijin, Gambih Pastor Henkholen Kipgen in tilkhouna thupi: 'Kingaito phauvin' Haggai 1:7 mangcha in thupi ngeitah aseijin, mipin taokhomna in akiban jomin, Programme jouse akichaijin khonei Houbung miten ahung kikhom Gambih mite jouse ngailut Ankong eisempeh un, Khomunnom Houbung mite chungu kipa thu akiseije. Pathenin Gambih mite jouse le alhacha Pastorpu eiumpi jing jeng tao hen.

Pu Janglal Touthang
Chairman Gambih No. 12

Pu Thenkholal Haokip
Secretary Gambih No. 12

Gambih No 13 Anngol taona



Pathen panpina jallin nisim 28th July, 2019 Sunday nikho hin KBC Gambih No. 13 Khangbarol Area in 68th chan na Gambih Anngol taokhom na chu Khangbarol Houbung mun a ana kimangin ahi. Gambih sunga Houbung ho akonin mi 120 ahung kikhom doh in Gambih Pastor Khupjoyful Singson in Gambih mipite tilkhouna aneijin, tuchunga lam hahsatah tah a kon a hung Gambih mipite le Gambih Pastorpa, chule khonei Houbung mite chungu jong kipa thu akiseije. Pathen jalla Programme lolhing tah a akichai thei jeh in Pathen thangvah aume. Pathenin KBC Gambih No. 13 phatthei boh jing taken

Pu Lamthang Touthang, Chairman Gambih No. 13

11 channa Gambih Anngol Taokhom, KBC No. 16



Nisim 20 July (Saturday) ni in, Centre Church Molnoi Area a, Gambih Men le Women Department mopoh nanoija 11 channa Gambih Anngol Taokhom akimang in ahi. Jinglam nidan 8 apat akipan in, Pr. Mangjapao Haokip, Gambih Pastor in Pathen thua Tilkhou nathu eiseipeh uvin chuleh, sunlam 12.30 in akichai in ahi. Mi 400 lam akikhom in, Church Choir akon in Lemna labung akingai in chuleh chang lasah jong mi 5 akon in akingai in ahi. Taona Items 11 ah, thanom tahle lunglut tah in aki taokhom in ahi.

Report by
Pu Seipao Haokip, Men Secretary, KBC No. 16

CONGRATULATORY MESSAGE



Dr. Letkholun Haokip in a Thesis: "Religion and Politics in Mizoram: Role of the Church", Mizoram University noiya Doctor of Philosophy (PhD) ahin muna chung a KBC in jong achunga kipapi na thu ahung ki phongin ahi. Ama hi Haikot KBC No. 20 akon ahin, 2013 kum chun Langol C/C mun ah Ordain ana changin ahi. 2016 vel a pat in AICS (BCM) mun a Registrar na ahin tong in, tut u hin M.Th. (History of Christianity)

AICS mun ah a sim in ahi. Hitobang a lolhinna ahin nei jing ding jong ikinem uve. Pathenin phatthei boh jing taken.

KOI SEI HAM

1. Numei hon a inkote anu apa adalah uva pasal khat ito-bang ahijong hechen louva abel jengu hi hangsan kasan, lungset louthei ahipouve.

By: H.Lalkhohen

2. Nupha neipeuvin gampha napeu vinge.

By: Napoleon the Great.

3. Ame siu seu ho sangin mit kao thim let lut ho lungthim ajang joe.

By: S. Suontak

4. Minu jouse hi kanu tabang leu Police le songkul ngai-ponte.

By: DL Moody

5. Itoh dingdol phatea kitoh hi Pathen houna ahi.

By: Mahatma Gandhi.

6. Atoh jouse thase pum pum a tongho hi ama le ama kisu genthei bep ahiuve.

By: Seikhokap.

7. Mi thutah ho hi imajouse a manthei ahin, mijou ho hi aman na ding aumpoi.

By: Rev. Nohkhopao

8. Kitomona le kinah na aumtengle nidanga mijou mi chavai a igel ho thu akila nomji e.

By: Rev. T Jamkhothang

9. Ipi kiloi khomna hijongle sum lam thu adih pou le 70% adihsa ahijitai.

By: Evan. L. Ngamboi

10. Eiman itoh ding jong kitongdoh jou louva mi natoh dem dem jeng kiti hi kaphah joulou nahitai tina ahi.

By: T. Chongloi Novelist

Condolance***Late Revd. D. Ngamkhothang Haokip***

(L) Rev. D. Athang Haokip
 Apen kum 25 Feb. 1961
 Appointment 1st July 1988
 Athini 21st July 2019
 1988 - 2008 Co ordinator Nepal Field
 2009 - 2019 Co ordinator Siliguri

(L) Rev. D. Athang Haokip, Siliguri Field Co-ordinator in tahsa dommo na khoh tah ana neija Siliguri Hospital mun a phat phabep anakijen chu, houbung mite ahepha jousen jong taona a ina kop u ahin, hijong leh Pathen in ama deilam tah a eiho kigot lou laitah a hetman louva eidalhah uhi KBC Pumpia ding in thomhao na lentah ahitai. Aman tutah a eidalhah nao chung ah Convention in lunghempi na nasatah akineijin Pathen in adalhah a insung mite leh gamsung mite jouse lungmonna pe ta hen. Houbung mite jousen adalhah ainsung mite din taona neikit ute.



**12 July 2019 nikhoo KBC Office staff jousen
Compound sung suhtheng na ana kineitai.**



**July 16, 2019 nikhoo Saijang (Karbi anglong mun a Mission program
noija School mun ding suhchetna Mission board in aga neitave.**



**Kumkim Audit Nisim 2 - 5 July chan In
Office mun ah phate cha in ana chelha tai.**

Post Regd. MNP/81
Regd No. 18134/88



KBC Events Anthah lop
21 July nikhon houbung tin ah
akimang in ahi.

If undelivered, please return to
The Editor. KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173